

Guangjisi Minzcu Bau

ganhhau: CN45-0036 B.2019 Nd.4 Ng.17 liggaueq geijhah nienz ndwensam cibsam

广西民族报

(壮文版)

主办:广西区民语委

出版:广西民族报社

出版周期:逢星期三出版

出版期数:总第3370期

Aen Fazdingz Cunzdauq Vahcuengh Ginhbwz Gih Fazyen Bae Lajmbanj Guh Fugsaeh Swhfaz "Sam Nyied Sam Bouxcuengh"

Ndwen 4 ngoenz 8, Ginhcouh Si Ginhbwz Gih Dasw Cin Nanzgenh Cunhvej Mbanjnazbu aen hozdung cietfwen "sam nyied sam" youq aen vwnzva gvangicangz ndaw mbanj banh, gyoengq vunzmbanj doxcomz youq giz ndeu caez angqhoh "sam nyied sam Bouxcuengh". Aen fazdingz cunzdauq Vahcuengh Ginhbwz Gih Fazyen yungh seizgei "sam nyied sam" vunz comz neix, bae Mbanjnazbu haiguh aen hozdung minzczu fapgvi haeuj mbanj, ndaej vunz lai haenh.

Mbanjnazbu dwg aen mbanj guhyiengh minzczu Gvangisih Bouxcuengh Swcigih, dwg aenmbanj gyauejvunz Bouxcuengh comzyouq, fungsug lai, ndaw mbanj seizneix lij louz miz gij vwnzva Bouxcuengh noengznwdnd. Aen fazdingz cunz-

dauq Vahcuengh youq Mbanjnazbu hozdung yienhciengz laeb aen camh fugsaeh camcaz faplwd, fazgvanh Cuengh Gun song vah yungh Vahcuengh gangj dap vunz lai camcaz faplwd, fat faplwd senhconz swliu hawj gyoengq vunz daeuj caeuqfaenh hozdung "sam nyied sam" haenx, ganggej mizgven dwkcawz bangvunz simnduk, baujhohlingh ndangvunz daengj faplwd cihsiz hawj vunz lai, daezsang gij fazci yisiz vunz lai.

Hozdung yienhciengz ndaej daengz vunz lai haenhndei, "boux gwnz muengx mizmingz" Mbanjnazbu—canghheiq haeuxnaengj haj saek Nungz Yuzhwngz caeuq fazgvanh Cuengh Gun song vah camcaz gij vwndiz faplwd, fazgvanh cungj gejdap sijsaeq. Boux vunzmbanj daeuj caeuq-

faenh hozdung youq baihnaj fuk baengzhoengz senhconz Cuengh Gun song saw vah dingz roengzdaeu, yungh Vahcuengh doeg Sawcuengh gwnz fuk baengzhoengz, vunzmbanj henzgyawj hix haenh nyauznyauz "Cuengh Gun song vah senhconz fapceih raeuj sim lai, hawj raeuz roxnyinh daengz gij heiqfaenh minzczu doxgiet caeuq aeueiq minzczu vunznoix, cungj senhconz fuengsik neix ndei lai, haenh gyoengqsou!"

Geij bi neix daeuj, aen fazdingz cunzdauq Vahcuengh ietraz gij ciznwnz saemjbueng, gaenxmaenx haiguh senhconz fapceih, hawj gij gvanhnen fapceih haeujlaeg sim vunz, vih cauh ok aenbiengz huzndei onjdingh daezhawj swhfaz baujjang rengzrwd.

(Liuz Cinghanz)



Sanhgyangh:

Youzczaz Homfw Fungcingz Noengz

Ndwen 4 ngoenz 14, Sanhgyangh Duncuz Swciyen Yangzhih Yangh Mbanjgauhlu banh ciet vwnzva youzczaz gaiq daihsam, vunz lai dangdieg yungh caz guh moiz, yungh caz gyau youx, yungh caz coi seng'ei, doenggyaq boq venz, ngaiz youzczaz caeuq langhbaij minzsuz daengj cezmu lai yiengh, langhbaij fungcingz Mbanjdung, yinx ndaej haujlai bouxhek daeuj yawjngonz. Ndaw doz dwg mehmbwk Duncuz guh youzczaz.

(Gungh Bujangh/龚普康)

Yungzsuij Guh Aen Hozdung Senhconz Cauhlaeb Aen Yienh Guhyiengh Minzczu Doxgiet Cinbu Daengx Guek

Vih caenh'itbouh giengzvaq son-gyauq senhconz aen yienh guhyiengh minzczu doxgiet cinbu, comz langhbaij gij cingzeik hong cauhlaeb minzczu doxgiet cinbu, mboengqneix, Yungzsuij Myauzczu Swciyen guh aen hozdung senhconz cauhlaeb aen yienh guhyiengh minzczu doxgiet cinbu daengx guek hingz sik lai yiengh haenx.

Hozdung guh comz senhconz, vwnzyi yienjok daengj. Comz senhconz hozdung giethab saedsaeh, doenggyaq venj fuk baengzhoengz, baij canjbanj, fat ceksa senhconz daengj fuengsik, senhconz gij minzczu cwngecwz dangj,

gij cihsiz minzczu doxgiet cinbu, gij cingzeik Yungzsuij gak hangz gak nieb gaijgwz hailangh seiqcib it hopbi aeundaej haenx, gungh venj fuk baengzhoengz 100 lai diuz, guh canjbanj 60 lai gaiq, fat ceksa senhconz 10000 lai cek(faenh), caenh-itbouh gya'gyangq gij naj cwgoemq caeuq rengzyingyangj senhconz; vwnzyi yienjok yungh "minzczu doxgiet ranz vunz ndeu, caemhsim hwnjguh aen loqsiengj Cungguek" guh cawjdaez, biujyienj le caij din venz, gag ciengq daengj gij cezmu vunz lai haengj dingq gyaez yawj haenx, langhbaij gij cingzeik gak minzczu

doxgiet caeuq gij yihi hungnaek hawj gyoengq vunz, mwh yienjok lij guh hozdung ciengj dap gij cihsiz cauhlaeb minzczu doxgiet cinbu dem, vunz lai yienhciengz gaenxmaenx caeuqfaenh dapdaez.

Baez son'gyauq senhconz hozdung neix hawj vunz lai gak cuz daengx yienh roxnyinh daengz gij heiqfaenh naekna minzczu doxgiet, bongjei hwnj raeuq heiq hoengh hag gij cwngecwz minzczu cunghgyau, henhoh aenbiengz huzndei onjdingh, netsaed doicaenh cauhlaeb aen yienh guhyiengh minzczu doxgiet cinbu daengx guek.

(Cinz Cunghdwz)

SIUSIK DINJ

● Mboengqneix, vunz lai Yungzanh Yen Daliengz Cin Mbanjgujan ciengj seiz guh-hong, ndaem ganq dinfaex makgaemjgaet, doenggyaq senj ganq dinfaex ndei, gaj non siudog, daihbungz ciepgaz daengj dinfwngz, yungh boiyngzyangj ganq dinfaex makgaemjgaet ndei, gai go 8 maenz doxhwnj, coicaenh vunz lai gungzhoj laisou, bang-rengz vut gungz baenz miz.

(Danz Gaijhingh)

● Mboengqneix, Baksak Si Yougyangh Gih Lungzconh Cin banh cietfwen "sam nyied sam" gaiq nduj. Cietfwen hozdung neiyungz lai, miz doiq fwen, youz gai gouzfuk, ndawbiengz doxdax mizyinx, langhbaij doxgaiq daegsaek minzczu, baij gai gijgwn ndei, ep bya doxdax daengj, yinx ndaej ca mbouj geijlai baenz 10 fanh vunz yienh gih, yanghein, mbanj henzgyawj daeuj caeuqfaenh.

(Vangz Cwnzgvei)

● Geij bi neix daeuj, Dwzbauj Yen Yendung Yangh ciuq dieg bae guh, damqra cingzsoq yungh ndei dieg-namh, baengh yienh gaep caizcwnz haeujcoengh, cien aen giyez bang cien aen mbanj daengj banhfap haenqrengz guh canjnieb banggungz, seiz-neix laebbaenz gak loih hozcozse dajndaem dajciengx 73 aen, nangqdaengz nonsei, makgam, mou, makgak daengj 19 aen dieggoek canjnieb cingq guh ndaej hoenghhwd, canjnieb nangqdaengz 1687 ranz ranzgungzhoj 7590 vunz, yawhsuenq bineix yae saedyienh 3 aen mbanjungzhoj 463 ranz ranzgungzhoj 1635 vunz vut gungz.

(Cinz Yinzbauj)

● Geij bi neix daeuj, Vanzgyangh Mauznanzcu Swciyen cauh gij binjbaiz makbug ndaw nding, dajndaem najdieg bi lai gvaq bi, baenz gij canjnieb youqgaenj banggungz aen yienh neix, huq mbouj you roen gai, dingz lai doenggyaq densangh, baij gai caeuq gaibuek gai liux, gyoengq vunzmbanj mbouj youheiq, ok rengz bae guh. Daengz seizneix, aen yienh neix gungh ndaem makbug ndaw nding miz 6.5 fanh moux.

(Veiz Yui)